

李文恭公遺集

李文恭公奏議卷十四目錄

湘陰李星沅石梧著

男

棣

編次

滇督

奏報校閱省營官兵情形摺子

甄別提舉州縣摺子

升補騰越廳同知摺子

審結雲州回匪全案摺子

附奏覆陳辦理雲回通盤籌畫片子

查參軍務不力各將備摺子

附參代辦順甯府彭衍墀片子

揀調雲南府知府摺子

揀調昆明縣知縣摺子

恭謝

賞加太子太保銜並賞戴花翎摺子

查覆回匪不靖嚴飭緝拏摺子

附奏張富實係因傷身死片子

奏保雲州回務出力文武員弁摺子

附清單

請獎滇省二次捐輸軍需各官紳摺子

奏明咨飭蔭德布仍署提督摺子

附奏搜除雲州零匪片子

附奏交卸雲南撫篆日期片子

奏謝調補兩江總督摺子

附奏道經湖南懇請

賞假省親片子

奏報校閱省營官兵情形摺子

奏爲校閱省營官兵情形並飭設法演練以期適用

恭摺奏祈

聖鑒事竊照滇黔兩省提鎮協營臣皆有統司之責自

上冬赴任一路接見營員卽經申明紀律切實告

戒計閱伍尙需時日而督撫兩標城守近隸會垣

自當首先整頓其年老技庸員弁數月以來節經

就近考察斥除茲於二月十二三四等日傳齊六

營官兵復加閱看所有合操大陣隊伍整齊馬步  
射亦多命中藤牌刀械等項頗能撲擊如式并以  
火器最要先期通飭各營凡考缺放糧均視鎗砲  
爲準務各演放純熟此次中數可觀進退連環聲  
勢亦皆聯絡除將技藝出衆各名分別拔補存記  
捐賞示獎外餘仍立限勤操惟滇省跬步皆山步  
驟必須趨健現設鉛瓦跑坡之法使其足力不疲  
滇人肩背習勞徒搏轉形怯弱現設矛桿刺靶之

法使其手力有準。滇兵向少徵調日久。寔安不知好強角勝。現設懸賞奪標之法。使其身材習於便捷。而亦易於奮興。至花法本屬繁文。現在刪定課程。以簡要收實濟。兵數頗虞缺額。現在督責鎮將。以強壯易虛羸。雖成效非一。躪可幾且積弱非一朝可挽。臣惟有勉之又勉。嚴益加嚴。日漸月摩。以計其功。信賞必罰。以作其氣。俾營員咸知振刷。邊備游致。精能仰紆。



聖主整肅戎行之至意所有校閱省營官兵並設法通  
飭演練各緣由理合繕摺具

奏伏乞

皇上聖鑒謹

奏 道光二十七年二月十四日具

奏奉

硃批所辦甚好欽此

甄別提舉州縣摺子

奏爲甄別才不勝任之提舉州縣請

旨勒休降補以肅吏治仰祈

聖鑒事竊惟安民必先察吏汰冗庶可遴才滇省地處  
極邊民貧事劇地方官稍不加察非以瘠苦支飾

卽以荒遠姑容自當核實剔除勉圖整頓臣抵任

三月督飭司道悉心體訪查有琅鹽井提舉徐惟

良前署巧家同知聽斷失平任性粗率輿論每多

不悞羅平州知州潘斌辦事迂疏力難振作近復  
兩耳重聽河西縣知縣陽之萃才識淺陋政體未  
諳均應據實

奏參請

旨將琅鹽井提舉徐惟良羅平州知州潘斌卽行勒令  
休致河西縣知縣陽之萃以府經歷縣丞降補歸  
部選用除飭司確查經手各項有無虧絀竝委員  
接署外所遺各缺滇省候補有人照例查明另補

此外如有庸劣之員容再隨時甄劾斷不敢稍存  
遷就貽誤地方謹繕摺具

奏伏乞

皇上聖鑒訓示謹

奏 道光二十七年二月十四日具

奏奉

硃批另有旨欽此內閣奉

上諭李星沅奏甄別才不勝任之提舉州縣一摺雲南

琅鹽井提舉徐惟良任性粗率羅平州知州潘斌辦事迂疎均卽勒令休致河西縣知縣陽之萃才識淺陋政體未諳著以府經歷縣丞降補歸部選用該部知道欽此

升補騰越廳同知摺子

奏爲極邊要缺同知遴調乏員仰懇

聖恩俯准升補以裨地方事竊照雲南永昌府分防騰

越同知梁金詔業經請升廣南府知府所遺騰越

同知係在外揀選題缺查該廳地處極邊界連緬

甸所轄七土司地方遼濶漢夷雜處一切控馭撫

綏均關係要非精明幹練熟悉情形之員不足以

資治理臣與藩臬兩司於通省應升應調人員內

逐加遴選非現居要缺卽人地未宜實無合例堪以升調之員惟查有南甯縣知縣彭崧毓年四十二歲湖北進士翰林院庶吉士散館以知縣卽用選授順天平谷縣知縣丁憂服滿起復赴部揀發雲南委用道光二十二年十一月到滇

題補今職二十五年二月奉文准補到任委署昆明縣知縣卸事現署騰越同知臣查該員年強才裕練達精明於邊地夷情均爲熟悉以之升補騰越

同知實堪勝任惟歷俸未滿三年與例稍有未符  
據雲南藩司趙光祖等謹遵人地相需之例會詳  
請

奏前來合無仰懇

天恩俯念要缺需員准以南甯縣知縣彭崧毓升補永  
昌府分防騰越同知於邊地實有裨益該員係現  
任知縣請升同知如蒙

俞允照例給咨送部引

李文恭公奏議

卷十四

滇督

六



見恭候

欽定所遺南甯縣知縣缺滇省現有應補人員容再遴  
員請補除將該員參罰案件飭查完繳造冊報部  
外再雲南巡撫係臣兼署毋庸會銜合併陳明謹  
繕摺具

奏伏乞

皇上聖鑒訓示謹

奏 道光二十七年二月十四日具

奏奉

硃批另有旨欽此內閣奉

上諭李星沅奏揀員升補極邊要缺同知一摺著照所請雲南永昌府分防騰越同知員缺准其以彭崧毓升補照例送部引見該部知道欽此

審結雲州回匪全案摺子

奏爲雲州回匪殲除軍務就戡所獲首要各犯審明  
卽行正法以彰

國憲餘犯按律議擬恭摺奏祈

聖鑒事竊照道光二十六年十月十五日大小猛統地  
方游匪一千餘人闖入緬甯新寨強搶燒殺猖獗  
異常經前兼署督臣據稟札飭騰越鎮總兵李能  
臣署迤西道黃德濂酌帶兵練馳往堵勦并委開

化府知府寶俊署撫標中軍參將伊昌阿會同查  
辦臣抵任後接准署提臣蔭德布咨調騰越龍陵  
鶴麗兵各五百名普洱威遠維西兵各三百名開  
廣楚雄兵各二百名并提標兵八百名一由順甯  
前路徑入一由緬甯後路抄出均由提督暫駐順  
甯調度預備同時夾攻詎該匪等因聞官兵將至  
又值雲州回匪馬登霄等打奪處決重囚卽於十  
一月十五六至二十三等日從緬甯散入雲州

回寨其大股逃向猛統者亦多陸續楚回同夥佔  
住竝探悉分途糾匪有一起竄順甯一起竄永昌  
之謠意在四路驚擾分我兵力各匪黨聞風喜事  
倡言護駭應援迤西頗爲聳動臣據各路探報節  
經飛致署提臣就近調齊勁練隨同已到官兵相  
機速勦并留防順甯府城一面添調普洱兵五百  
名新習維西兵各三百名威遠鶴麗東川兵各二  
百名由省派委維西協副將果仁布東川營參將

愛興阿署督標游擊懷唐阿分起管帶赴營又飭景蒙兵二百名赴神舟渡劍川兵二百名赴馬台渡臨元楚雄永北等營兵一千餘名分佈蒙化各要隘嚴密防堵均聽提督調遣并

奏委臬司普泰移駐蒙化策應務期逐層圍裹悉數殲擒毋令一名漏網嗣據雲州大營按日飛報官兵先後接仗數十次約斃賊匪六七百名生擒三十七名又寨回勒獻二十名又各鄉練堵拏截殺

擊沈無數匪黨始就肅清茲由署池西道黃德濂  
開化府知府寶俊督同委員候補提舉夏光煜試  
用通判孫曷試用知州胡道驥等將雲緬劫囚滋  
事案內拏獲勒獻首從各犯審明分別正法定罪  
由臬司核審彙詳前來臣覆加確核緣馬欄海卽  
黑牙齒係甘肅大通縣回民因在緬甯廳地方誤  
買賊馬被控差拏戮傷差役身死審擬斬候由省  
發回監禁中途脫逃之犯馬登宵係雲州回民海

卷之四十一 雜錄

連升係陝西鳳翔縣回民寄居雲州回寨馬亨科亦係雲州回民因聽從馬子梁糾毆案內擬軍逃回之犯平日均相熟識道光二十五年十月馬幟海由蒙化脫逃後卽隨猛庭回匪連次抗拒官兵旋至鎮康灣甸夷地潛匿道光二十六年九月該犯在大小猛統地方起意商令回民海連升謝郎子卽謝幟柱黃添潰卽黃小七馬逢春黃病七蔡重秀馬占魁馬得喜賴金祥畢上淋滕雲吳開先



黎小科徐小黑并已被殲斃之海老陝姚老五撒  
老九蔡老耶及已獲病故猓獾茶五十六漢民戴  
軍照羅大順等展轉招集四外游匪一千餘人藉  
稱挾道光十九年客民械鬥殺死回民之嫌同赴  
緬甯廳捨殺滋擾代理順甯府彭衍墀署順雲營  
參將巴揚阿聞信馳往因順甯縣樂黨回犯張富  
馬效青卽大白象秋間投誠後曾赴右甸勸導漢  
回和好彭衍墀卽令隨往緬甯解散詎馬愾海等

已入新寨各村燒殺劫掠張富馬效青帶練百餘人趕至勸阻不聽欲見彭衍墀回話該廳漢民不依卽向截擊回匪遂偪令張富等暗中入夥張富等亦卽允從當經該鎮道稟請發兵勦辦十月二十八日代理雲州知州顧壬濬奉文處決該州擬絞監犯馬子鳴易幗亮二名回民馬登霄聞信因與同教相好起意糾搶放走隨向同寨已獲回民掌教馬幗相甲長馬扶潰鄉約馬懷任張安舟馬

世寶馬重才白正明漢民羅真并已被殲斃回民  
馬六九馬成受馬保原馬五苟等商允聚眾百餘  
人持械中途搶奪張安舟用木棍毆傷外委賀萬  
年左腳蹠馬世寶羅真各用刀背毆傷兵丁一人  
將該二犯刦去經臣專摺

奏參代理知州革職留緝時緬甯滋事各匪聞知官  
兵將至共商他竄內有雲州回匪海連升起意邀  
允馬綱海張富馬效青謝郎子黃添潰馬逢春黃

病七蔡重秀馬占魁馬得喜戴軍照羅大順賴金  
祥畢上淋滕雲吳開先黎小科徐小黑茶五十六  
海老陝姚老五撒老九蔡老耶共帶緬甯四外回  
衆及由猛統楚回各匪約有六七百人自十一月  
十五六至二十三等日來到雲州商同抗拒官  
兵該寨原生馬應星馬應圖等著人趕至頭道水  
地方再三攔阻不住又有馬登宵張安舟馬世寶  
羅真馬亨科馬重才白正明馬幗相馬扶潰馬懷

任馬六九馬成受馬保原馬五苟及不記姓名寨  
回多人聽從入夥強取清真寺公費使用十二月  
初三日總兵李能臣統兵進紮把邊關初四日游  
擊倭什渾泰署游擊陳得功騰越明光隘土守備  
左大雄各帶兵練前進道經樂黨因查該處回匪  
張富馬效青實在踪跡卽有匪徒在東山哨施放  
鎗砲兵練奮勇攻擊該匪抵敵不住逃入後山箐  
林又經兵練跟追殲匪十七名斬級一顆練丁帶

傷一名當將該寨燒燬餘匪多入雲州初五日行至州境蠻帕寨突有回匪數百持械擁阻官兵兩次殲擊各數十名斬級二十顆左大雄追前追殺鎗斃賊匪數十名斬級十二顆賊始大敗退至州街將街市房屋焚燒官弁分途撲救左大雄一見火起向內衝殺該匪鎗砲甚多迎頭阻截輒行開放獄囚隨有監犯十三名因變逃逸適署提標千總汪海帶兵自外攻入左大雄帶練自內攻出約

殲賊匪二百餘人并將賊目海老陝斬級懸示賊  
始稍退兵練陣亡二名受傷九名至二更時該匪  
復偷劫廣福寺營盤左大雄督練迎擊賊匪多被  
倒斃全股敗逃連日我兵進攻均有斬獲兵練亦  
有傷亡十一日副將果仁布接駐把邊關總兵李  
能臣隨帶親兵竝借試用知州胡道驥前往籌勦  
紮營蠻朶山正值我兵接仗李能臣卽開劈山砲  
轟斃數十人十二日早起該匪由象山旁突出李

能臣督飭官兵及練總楊鍾靈等仍用劈山砲轟斃數匪并將執旗鳴鑼二犯立時擊斃賊卽拖屍逃回又水磨有匪一股被左大雄帶練擊退十三日我兵往攻該匪先伏寨內暗用鎗砲抵拒我兵將撤羣匪忽披散頭髮臉塗紅黑手執刀矛追撲仍被兵練趲回擊敗十四日李能臣分兵三起親帶委員胡道驥臨陣督催連用大砲轟震賊巢該匪甫出被擊退入山坡觀音閣內李能臣督同左



大雄率領兵練奮勇攻擊將閣用砲轟倒壓斃賊  
匪多名餘匪逃竄兵練復行追殺又斃無數時游  
擊倭什渾泰署游擊陳得功署都司周鴻勛呂盛  
元等督率兵練直攻賊巢已進頭道柵門向前擊  
殺賊勢甚迫適遇大雨撤回是日殲斃賊匪約有  
百餘名兵練受傷十八名賊匪由此益加堵塞寨  
柵每遇兵練進攻止於街口墻洞施放鎗砲廣西  
營外委陸春於十七日在象山誘賊出戰被砲轟

傷左太陽當時陣亡兵練陣亡二名受傷二十五名二十一日李能臣分兵三路攻打并設埋伏接應佯敗誘戰共斃賊匪五六十名左大雄帶練衝殺又斃賊匪二十餘名乘勢直攻賊巢該匪復匿墻裏連放鎗砲騰越千總毛文元被砲轟傷左乳下旋即亡故守備楊遵千總汪海李高額外張瑞林均被鎗傷醫痊兵練陣亡五名受傷二十一名又經李能臣飛催猛麻猛各練及續調騰越各

練連日併力環攻轟斃賊匪無數并割獲首級存  
記又生擒賊匪茶五十六賴金祥吳開先陳政畢  
上淋黎小科李發徐小黑等犯又練總許登成在  
回寨南柵外截殺中山來援回匪二十餘人生擒  
二名又練頭和泰在丙隴小寨截殺燒搶回匪十  
八人練丁被傷二名又蒙化灣子渡有回匪三百  
餘人自紫太筏渡江援賊兵練四面攔截開鎗轟  
擊盡將回匪擊沈賊勢日漸窮蹙該寨矜耆等屢

向大營乞限細兇卽經鎮道委員因勢設間密授  
機宜十二月二十四日先將刼去絞犯馬子鳴易  
欄亮二名細送驗明委係正身解赴臬司收審依  
律處決又據兩次細送馬世寶羅真張欄正馬升  
貴謝郎子黃添潰等犯并繳銅砲抬鎗烏鎗矛桿  
各件臣據大營稟報卽以該回寨獲罪甚重匿匪  
尙多安知非細獻數人誓爲緩兵之計節經嚴催  
鎮將激勵軍心奮速勦洗并咨署提臣親往督催

復飭署迤西道等切究現獲各犯首禍實係何人  
務獲擒治隨據供馬嶠海係緬甯滋事爲首馬登  
宵係雲州劫囚爲首海連升係雲州聚眾抗官爲  
首及各夥犯姓名又據供張富於去年十二月十  
四日在雲州觀音閣被矛戳傷身死馬效青卽大  
白象不知去向等語臣復飛飭兇擒且以張富死  
無証據仍卽上緊勒拏竝因邊荒藐法若仍獲犯  
解省徒令大憝稽誅尤恐長途疎脫惟就犯事地

方研審確實立正典刑兇徒始知儆畏疊札嚴飭  
遵辦嗣由大營兵練擒獲馬逢春戴軍照羅大順  
宋時康袁潮相滕雲楊政陳二楊學羅兆淋等犯  
又回寨續獻馬登宵張安舟黃病七馬亨科等犯  
餘仍延不交出又經李能臣於正月初十日將兵  
練分五股環攻賊亦分股出迎殲斃四五十名十  
一日署提臣到營復經鼓勵兵練懸立重賞自十  
五日起輪流晝夜分起圍攻賊仍匿不出巢多方

誘戰每日不過數十人傷斃過半并將九節大砲  
轟倒賊營帳房砲子飛入寨內屋瓦破裂人多受  
傷號呼之聲不絕又據該寨矜耆赴營泣求並將  
著名川陝回匪馬重才蔡重秀白正明三名先行  
網獻所有指拏首犯本極兇橫近因駭匪被殲藏  
身甚固又寨內掌教馬欄相鄉約馬懷任甲長馬  
扶潰實爲首惡死黨趁他來營邀恩求卽扣爵不  
放再得兵練助勢方好設法協拏當經委員准行

先傳馬幟相馬懷任馬扶潰三犯到營回話立即  
鎖解順甯收審隨據該寨衿耆將馬幟海一犯誘  
至柵口我兵出其不意撲向砍戮生擒該犯復自  
抹脖項受傷甚重當經提鎮驗明左手舊無大指  
訊據自認曾到猛庭打仗此次緬甯滋事糾約爲  
首復到雲州抗拒官兵屬實卽於營前恭請

王命凌遲梟示又因海連升一犯性喜飲酒寨回先向  
獍獠練覓取努葯將該犯招飲毒迷捆送旋復用



納灌醜解至順甯收審又訪獲馬效青之子馬扶  
科及其甥馬科訊明馬效青逃出不遠趕緊追拏  
適有猛浪回匪燒殺漢人村寨距雲州六十里東  
川營參將愛與阿分兵往捕連得勝仗正在尅期  
勦滅偵知馬效青竄匿在內卽加兵練合圍問道  
埋伏於正月二十六日將馬效青拏獲隨卽攻破  
該寨前後殲斃賊匪六七十名斬級十一顆搜獲  
馬乘良馬二白馬延遲馬凌雲楊岑李四林馬七

二馬從隴馬小老等犯及劈山砲鳥機砲趕羊鞭  
鎗矛賊旗等件馬效青獲解之日急吞火石二塊  
不肯飲食亦由順甯收審又回寨擒獻馬得喜一  
犯由大營訊取生供自認前年永昌回匪滋事同  
在枯柯河打仗砲傷右膝蓋此次聽從入緬燒搶  
復至雲州抗拒官兵因被拏拒捕格傷未及解郡  
身死又順甯訪獲馬占魁一犯訊明卽馬師兄自  
認由緬甯隨同燒搶并至雲州抗拒官兵甫於打

仗時乘間逃出被擊又緬甯順甯兩廳縣訪獲私  
造火藥硝磺售賣人犯楊發總李老三李耀川楊  
其淋楊正玉五名一併擬解查案內首要匪犯除  
當場殲斃九名餘俱全獲駭匪亦就殄滅提鎮道  
府各員親至州署查點監倉卽入回寨察看該寨  
老幼男丁數百人均隨衿耆焚香跪迎至清真寺  
一面拆牆平濠呈繳器械卽飭全數填毀繳銷軍  
務就竣所有先後拏獲各犯應卽歸案議結嚴訊

該犯馬懶海入緬滋事實係勾結無業游匪希圖  
焚搶得財至雲州劫囚係馬登宵登時起意糾搶  
彼此各不相謀迨後海連升在緬聞知官兵將至  
邀集各匪同入雲州抗拒燒街放囚止圖擾亂官  
兵寨內良回曾經攔阻不聽力實無可如何加以  
刑嚇衆供如一委無商同謀爲不軌重情至張富  
一犯僉供被矛戳傷左脇致斃回寨繳到犯屍卽  
經署雲州知州許士杰檢驗被傷處所及屍衣矛

戮穿洞并訪獲該犯之母木氏妻羅氏到案研究均與各供相符現仍解赴省城聽候驗訊辦理臣覆核無異查律載謀叛但共謀者不分首從皆斬又內地私販硫磺硝磺如合成火藥賣與鹽徒者發近邊充軍又在監斬絞重囚及遣軍流徒人犯如有因變逸出自行投歸者俱照原犯罪名減一等發落如被拏獲者仍照原犯罪名定擬各等語此案馬愾海原犯斬候脫逃胆敢糾匪千餘人燒

劫村寨復聽從抗拒官兵海連升隨衆燒搶復起  
意糾約抗拒官兵燒街放囚實屬首禍主謀罪大  
惡極馬囑海海連升應比照謀叛者斬律從重凌  
遲處死張富馬效青馬登宵馬秉良張安舟馬世  
寶羅真謝郎子黃添潰黃病七馬逢春蔡重秀馬  
占魁馬重才白正明馬囑相馬扶潰馬懷任馬六  
九馬成受馬保原馬五苟馬二白馬正寅馬同寅  
撒老十撒尙添馬得喜戴軍照羅大順海老陝姚

老五撒老九蔡老耶或投誠復竄或糾眾劫囚或  
起意燒搶或劫掠助勢均經隨同抗拒官兵應比  
照謀叛者斬律從重斬立決梟示張富馬得喜戴  
軍照羅大順馬二白均照例戮屍海老陝姚老五  
撒老九蔡老耶馬六九馬成受馬保原馬五苟馬  
正寅馬同寅撒老十撒尙添均已殲斃不議馬亨  
料茶五十六賴金祥畢上淋滕雲吳開先黎小科  
徐小黑或聽糾抗拒或倚眾焚掠應從重比照謀

叛者斬律斬立決茶五十六病故不議以上問擬  
凌遲斬梟斬決各犯共四十四名除殲斃病故戮  
屍十八名及馬欄海已在軍前正法外餘皆情罪  
重大未便稍稽顯戮飭由臬司及署池西道審定  
後卽行分別恭請

王命照律處決傳首犯事地方以昭炯戒馬廷選馬凌  
雲馬七二馬從隴馬小老李四淋馬升潰張幘政  
陳政羅兆淋宋時康李發袁潮相陳二楊學楊政



訊止聽從回匪受雇或煮飯服役或代送書信均  
未隨同抗拒官兵亦應比照謀叛爲從上減一等  
律於各犯斬罪上量減一等改發新疆給官兵爲  
奴回民照例調發李四淋業已病故應無庸議案  
係比照辦理家屬例免緣坐財產亦免入官李老  
三李耀川楊發聰楊其淋楊正玉各自起意私販  
硝磺合成火葯售賣應比照私販硫磺烟硝合成  
火葯賣與鹽徒發近邊充軍例發近邊充軍其因

變逸出監犯十三名已獲馬恩從馬欄安二名又  
自行投首原犯擬絞楊有華一名擬徒陳欄漢一  
名照例辦理餘飭上緊緝拏楊岑被脇未經入夥  
訊明省釋緬甯廳被燒村寨已委員查明撫卹雲  
州被燒民房該寨良回自願量爲賠修亦與猛浪  
民房委員會勘辦理雲州衙署監倉勘明并未燒  
燬搶失市民陸續招回竝諭該寨良回共敦和好  
如再容畱外匪從嚴懲辦仍飭鎮將嚴速分投搜

捕零匪以淨根株原調兵練除酌量留防外餘卽  
撤回騰越中營千總毛文元廣西營外委陸春均  
被鎗砲傷陣亡應照例請

旨賜恤以昭激勸其餘傷亡兵練由營造冊詳咨請恤  
支用鹽糧銀米各款事竣核實報銷臬司秋錄屆  
期卽令回省辦事緬甯廳通判慶蔭署順雲營參  
將巴揚阿當游匪入境雖各疎防於前卒能保護  
城池城內居民幸未受害功過尙足相抵已革代

理雲州知州顧王濬汎弁蘇萬年吏目鈕鳴臯於  
被放監囚內有絞犯三名未獲仍應革職協緝代  
理順甯府知府彭衍墀現經另摺

奏參除全案供招咨部外所有雲州回匪勦辦蕝事  
緣由理合恭摺具

奏伏乞

皇上聖鑒勅部議覆施行謹

奏 道光二十七年三月二十二日具

奏奉

硃批另有旨欽此內閣奉

上諭李星沅奏雲州回匪殲除軍務就蒞一摺所有陣  
亡千總毛文元外委陸春均著照例賜卹已革代理  
雲州知州顧壬濬汎弁蘇萬年吏目鈕鳴臯於被放  
監囚內有絞犯三名未獲俱著革職畱於該地方協  
緝務獲餘依議該部知道其所擬罪名著刑部議奏

欽此

附奏覆陳辦理雲回通盤籌畫片子

再臣承准軍機大臣字寄二月初九日奉

上諭李星沅奏官兵籌勦雲州回匪情形一摺雲州回  
寨匪犯拒捕恃險負嵎不法已極若非實力痛勦示  
以兵威恐遷就於目前必致貽患於日後該督等卽  
嚴飭鎮將激勵軍心立加攻勦斷不可因獻出數犯  
收繳器械數件遂信爲賊勢窮蹙又復將就了事等

因欽此伏讀之下曷勝悚惕查雲州回寨疊次縛

匪獻囚臣據大營稟報均卽嚴飭勿聽一力速催  
攻勦先後接仗數十次賊黨殲斃六七百名拏獲  
五六十名兵練亦有傷亡始得首要各犯悉就殄  
滅實未敢將就了事至通省漢回雜處迤西各屬  
尤多非外寇諸夷可比從前互鬥之案不過民與  
民仇近則漸移之官甚且各聽之匪蓋回民心齊  
性悍頻年逞忿報復漢民力不能支節經地方官  
請兵查拏回始受剗若止知有漢民而回民怨官

矣漢民既受荼毒藉兵雪仇喜爲官必滅回之說  
一有官兵治回輒欲盡殺乃止官未允許又若不  
知有漢民而漢民亦怨官矣於是回民之狠戾者  
愈結匪爲心腹以肆其強橫漢民之狡黠者亦藉  
匪爲爪牙以巧於訛索而各路各廠游匪因以爲  
利任其所之人衆則數無可稽地廣則勢不易禁  
所最堪憐憫者漢回般實之戶與良善之民耳卽  
道光二十五年六年兩屆回務一洗保山一燬猛庭



官兵原在擊匪而匪黨首要時有竄逸其安分不  
爲匪者流離瑣尾窮而無歸轉至不可勝計與漢  
民被害略同至今尙難收拾此次勦辦雲匪臣揆  
度機要內回富而外回貧外回強而內回弱與其  
濫殺而徒滋藉口何如密計而先務攻心果能奮  
勇出奇全力制回卽可以回擒回并可以回擒匪  
旣破護駭之習兼示殲渠之威且日後報復無所  
歸怨自雲州以外如順甯之狗街右甸永平之曲

嗣新村蒙化之濠溷圍埂向皆匪徒出沒之所趁  
此兵有餘勇賊有懼心自應分路搜檢嚴加整頓  
又前次緬甯股匪逃入猛統地方旋卽聞風散匿  
仍飭確切偵探密速堵拏雖蚩氓反覆何常積怨  
衅端易啟未必因此一舉遂就帖然惟當非種必  
鋤無稍姑息使之有所畏而勢不逞并有所忌而  
黨不堅似可漸祛惡習臣故曰治回必先治匪匪  
不治則回不治卽漢亦不治也邊郡不知有法由

來久矣方今亟務莫如執法莫如持平以執法漢  
回同體犯則重懲如治亂絲必徐爲理如東急水  
必大爲坊準除暴安良之施絕欲速見小之弊慎  
選文武責成公當保甲以清內匪團練以禦外匪  
各路嚴巡卡以杜匪之往來各廠嚴簿籍以防匪  
之出入庶於元氣無損而於大局有裨若軍務徒  
勞則邊情易動非重兵無以振武非重餉無以集  
兵計前兩屆軍需除沿路供支難民撫卹各項已

逾二十萬兩今又逾十萬兩經費浩繁不敢不通  
盤籌畫臣凜遵

恩旨詳加體察悉心酌辦復奉

硃諭妥實相機而行謹再密片上

聞伏乞

聖鑒訓示謹

奏

硃批另有旨欽此

李文恭公奏議

卷十四 澳督

三九

查參軍務不力各將備摺子

奏爲查參軍務不力之將備請

旨分別降革以肅戎行仰祈

聖鑒事竊惟行軍之道賞罰爲先非有賞罰則軍政不  
明止有賞而無罰則軍威不肅此次雲州軍務經

臣申明紀律嚴定考成札諭交馳探訪加密署提  
臣亦親往催勦自鎮將以下咸知奮勇敢前尙無

畏怯積習惟查有景蒙營遊擊鳴起署騰越左營

都司安如嵩新習營守備張連仲紮營水磨一帶  
適該回寨獲解前劫重囚時有外匪搬運火藥乘  
便混入寨內未能立刻兜拏殊屬堵截不力又威  
遠營參將扎克當阿甫由緬甯進兵匪徒先竄雲  
寨提鎮飛飭移駐新興街行程稍覺遲緩殊屬移  
營不力又署景蒙營守備李廷相奉委帶兵防堵  
蒙化神舟渡逾月未報起程隨由大營札催亦未  
明白稟覆殊屬赴調不力以上各員當經提鎮在

營記過記責以觀後效惟安如嵩隨同扎克當阿  
續獲火藥六挑及挑藥各犯并疊次打仗殺賊尙  
堪自贖前愆餘卽著有微勞亦難稍存遷就必須  
明懲旣往庶可示儆將來相應據實

奏參請

旨荆威遠營參將札克當阿降爲遊擊景蒙營遊擊鳴  
起署騰越左營都司臨元鎮右營都司安如嵩均  
降爲守備新習營守備張連仲署景蒙營守備督

標右營守備李廷相均卽革職所遺參將遊擊各  
缺滇省現有揀發人員容再遴選請補爲此恭摺  
具

奏伏乞

皇上聖鑒訓示謹

奏 道光二十七年三月二十二日具

奏奉

硃批另有旨欽此內閣奉



上諭李星沅奏請將軍務不力之將備分別革職一摺  
景蒙營遊擊鳴起等經該督派赴軍營或未能兜拏  
外匪或移營遲緩或赴調遷延均屬軍務不力威遠  
營參將札克當阿著降爲遊擊景蒙營遊擊鳴起署  
騰越左營都司臨元鎮右營都司安如嵩均著降爲  
守備新習營守備張連仲署景蒙營守備督標右營  
守備李廷相著一併革職以示懲儆該部知道欽此

附參代辦順甯府彭衍墀片子

再查代辦順甯府彭衍墀於上年十月緬甯游匪  
滋事馳往彈壓輒因回犯張富馬效青業已投誠  
并未稟明該管上司徑自諭令隨往及該二犯到  
緬致被匪徒裹脇絕不知有防範又未立時稟明  
經臣密飭鎮道嚴速偵訪併提各犯根究始悉該  
二犯潛匿雲州是該員彭衍墀既已率妄於前又  
復含混於後實屬糊塗荒謬相應據實

奏參請

旨將代辦順甯府晉甯州知州彭衍墀卽行革職所有  
順甯府篆卽以准升該府卸署迤西道黃德濂就  
近接任以專責成其晉甯州一缺滇省現有應補  
知州容再循例請補合併陳明伏乞

聖鑒訓示謹

奏 道光二十七年三月二十二日具

奏奉

硃批另有旨欽此內閣奉

上諭李星沅奏請將代辦知府之知州革職等語雲南  
代辦順甯府事晉甯州知州彭衍墀於回犯張富馬  
效青投誠并不稟明上司徑自諭令隨往緬甯及該  
二犯被匪徒裹脅既未能先事防範又不立時具稟  
實屬糊塗荒謬彭衍墀著卽革職餘依議該部知道  
欽此

揀調雲南府知府摺子

奏爲遵

旨揀員調補省會知府恭摺奏祈

聖鑒事竊臣接准部咨欽奉

上諭雲南雲南府知府員缺緊要著該督撫於通省知  
府內揀員調補所遺員缺著張亮基補授欽此伏查  
雲南府係省會首郡管轄十一州縣地方遼濶政  
務殷繁且時有發審案件必須精明幹練之員方

足以資治理 臣與藩臬兩司於通省知府內詳加  
遴選查有臨安府知府桑春榮年四十六歲順天  
進士改翰林院庶吉士散館授職編修歷充

國史館協修纂修總纂官

起居注協修官道光二十一年充辛丑

恩科會試同考官二十二年二月補授河南道監察御  
史七月轉掌四川道監察御史十月奉

旨補授雲南臨安府知府二十三年閏七月到任

奏護池南道卸事現畧雲南府知府臣查該員練達

精勤器識閱遠以之調補雲南府知府實堪勝任

如蒙

俞允該員係現任知府請調知府銜缺相當毋庸送部

引

見并請照例免開參罰所遺臨安府知府員缺遵

旨卽以張亮基補授據藩臬兩司會詳前來臣謹恭摺

具

奏伏乞

皇上聖鑒訓示再雲南巡撫係臣兼署毋庸會銜合併

陳明謹

奏 道光二十七年三月二十三日具

奏奉

硃批另有旨欽此內閣奉

上諭李星沅奏揀員調補省會知府一摺著照所請雲南雲南府知府員缺准其以桑春榮調補所遺臨安



府知府員缺卽以張亮基補授該部知道欽此

揀調昆明縣知縣摺子

奏爲揀員調補省會知縣恭摺奏祈

聖鑒事竊查昆明縣知縣侯晟業經奏奉

諭旨准升昭通府大關同知所遺昆明縣知縣係衝繁

疲難四項相兼要缺地當省會政務殷繁非幹員

弗克勝任例應在外揀選調補臣與藩臬兩司於

通省合例應調知縣內詳加遴選非現居要缺卽

人地未宜惟查有定遠縣知縣賈洪詔年三十九

歲湖北進士奉

旨以知縣卽用籤掣雲南道光二十一年三月到省

題補今職二十五年七月到任現署昆明縣知縣該  
員守潔才明樸誠開展以之調補昆明縣知縣洵  
堪勝任惟歷俸未滿三年與例稍有未符但省會  
首邑要缺人地實在相需據藩司趙光祖臬司普

泰會詳遵例請

奏前來合無仰懇

天恩俯准以定遠縣知縣賈洪詔調補昆明縣知縣實  
於地方有裨如蒙

俞允該員銜缺相當毋庸送部引

見除飭將參罰俸銀繳清報部所遺定遠縣知縣查明  
應補人員飭司按班序補外臣謹恭摺具

奏伏乞

皇上聖鑒訓示再雲貴總督係臣本任毋庸列銜合併

陳明謹

奏 道光二十七年三月二十三日具

奏奉

硃批另有旨欽此內閣奉

上諭李星沅奏揀員調補省會知縣一摺著照所請雲南昆明縣知縣員缺准其以賈洪詔調補該部知道  
欽此

恭謝

賞加太子太保銜並賞戴花翎摺子

奏爲恭謝

天恩仰祈

聖鑒事竊臣於道光二十七年三月二十七日准吏部

咨開三月初四日內閣奉

上諭李星沅奏官兵圍勦回匪首要各犯續行拏獲勒  
交餘匪漸就肅清一摺所辦甚好可嘉之至李星沅

李文恭公奏議

卷十四 滇省

四

調度有方辦理迅速著賞加太子太保銜並賞戴花翎以示優獎等因欽此聞

命之下兢惕倍深伏念臣質本愚蒙學疏軍旅自移六  
詔值小醜之跳梁倏歷九旬甫巨渠之駢戮戒修  
矛於偕作顧籌筆以何功廼蒙

黃幄垂慈

丹毫嘉許荷

九天之

雨露

恩賁宮銜軼萬古之雲霄

寵加冠飾

鳳綵新頒乎金馬雀翎竝燦夫珥貂

優獎逾涯竦慙交集臣惟有慎修邊備勉肅戎行丞輔

兼司恐負

鴻施之稠疊羽儀叶吉彌殷鼇戴以繩趨所有微臣感

悚榮幸下忱理合繕摺具

李文恭公奏議

卷十四

滇督

四



奏恭謝

天恩伏乞

皇上聖鑒謹

奏 道光二十七年四月初一日具

奏奉

硃批知道了欽此

祥等二十八名又順甯縣水洩廠游匪借端搯詐  
現獲首犯楊履富等二名保山縣猛庭寨游匪挾  
嫌擾害現獲首犯范小黑一名誠能文武同心有  
犯必獲小懲大劓法無稍寬彼亦何樂而爲匪也  
臣惟治匪之要一在擇吏一在練兵吏治不修則  
豢匪自甘兵力不足則避匪恐後卽以團練論法  
與保甲相維然四外游民未可從中溷跡必專用  
土著無出其鄉又以夷練論向爲攻勦之助然遐

荒異類未可倚令前驅必精練官兵以隱爲制原  
奏竝及邊鄙亦云遠謀臣猥任封圻刻深惴恐惟  
當凜遵

訓示嚴飭地方文武各官隨事隨時實力懲辦毋稍輕  
縱玩延以冀勉紓

宸注所有奉

旨確查緣由謹據實覆

奏伏乞

皇上聖鑒謹

奏 道光二十七年四月初一日具

奏奉

硃批所論均是總在實力認真欽此

附奏張富實係因傷身死片子

再臣於本年三月二十七日欽奉

上諭李星沅奏官兵圍剿回匪首要各犯續行拏獲勒  
交其張富被矛戳傷身死一節仍著該督確切查明  
務得實據等因欽此查該犯張富於去年十二月十

四日在雲州觀音閣被官兵矛傷致斃先據署迤  
西道黃德濂委員開化府知府寶俊提訊先後獲  
犯供詞如一旋據回寨繳到犯屍筋委署雲州知

州許士杰驗報張富屍首左腋肌被矛戳入一寸

八分汗衣短鬚身俱有矛戳穿洞并犯母木氏妻

羅氏一見該屍淚如泉湧慟哭失聲所供均屬相

符由該道府核稟前來臣以該犯張富之死僅據

各犯供詞難保必無串飾犯屬見屍慟哭難保必

無假裝署知州驗明屍首傷痕屍衣穿洞亦難必

無合混當經批飭解省親加驗訊并因馬效青平

日與該犯蹤跡最密現獲其子與甥一併飭令管

解以資互證嗣據陸續解齊臣卽飭委雲南府知  
府桑春榮先提犯屬隔別研審推求覆查該犯屍  
首日久益形腐爛卽飭如法蒸檢臣偕司道親驗  
檢得該屍左肋骨白色無傷惟頂心骨連偏右圍  
圓八寸七分有血暈紅活色係生前左脇受傷之  
瘡上齒脫落三箇下齒脫落五箇上下齒根有血  
暈紅活色係生前虛軟處受傷之瘡又驗得該屍  
原穿藍布緊身汗衣各一件血污臭穢異常衣衿

貼左脇處有鐵器尖戳穿小洞各斜長四五分寬  
一二分不等均與原驗無異臣復督同司道親提  
犯屬嚴訊據張木氏供氏子張富趕馬爲生近年  
在外鬧事不盡知道去年冬月二十一日從緬甯  
回樂黨將家搬至雲州臘月十四日回民馬得喜  
邀他打仗上午時聽說在觀音閣被官兵用鏢戳  
傷左脇擡回清真寺忙同媳婦羅氏往看他已不  
能言語用手摸他左腕染得一手鮮血衆人都教



不要啼哭隨用白布纏裹擡到象山掩埋現解屍  
首是真等供又據張羅氏供幼嫁緬甯王小七爲  
妻道光十九年臘月因丈夫被人殺死前往順甯  
告狀路過雲州清真寺被張富看見搶回樂黨偏  
爲繼妻去年冬月同到雲州臘月十四日張富往  
馬得喜處早飯回家脫去身上湖縐緊身換穿藍  
布緊身繫了腰帶拏了牙桿刀子出去隨聽說他  
受傷趕往看視他左脇上隔著衣服出血叫他幾

聲不應只見左眼一翻卽時氣絕犯婦原非張富  
婚娶的不願再到張家只求發交羅家等供餘與  
張木氏同又據馬科供去年十二月初間在雲州  
遇見張富兩次到十四日聽說他被官兵戳死埋  
在禮拜寺後小民過些日子還隨人去念經的馬  
扶科供略同又據提到該犯所用銀包烏鎗鐵鎗  
木柄鐵矛各一桿騎馬二匹男女衣履各物二十  
七件內紅布長帶一條多有血跡訊係該犯是日

打仗繫腰之物又該犯田房新舊契一包新契書  
載價銀一百六十五兩楊有義家賣與富張老爲  
業訊係去年秋間在樂黨置買之產臣悉心審察  
該犯屍傷血瘡既已信而有徵犯屬與各犯供詞  
反覆窮究并非一人一事一地一時類皆不謀而  
合又有衣物馬匹田契等件均堪証據是該犯張  
富之死實無可疑除屍骨屍衣封存外張木氏就  
近安插張羅氏傳查羅姓親屬領回馬科馬扶科

亦卽分別發落所有張富傷斃緣由謹確切查明  
覆

奏并調任廣東撫臣徐廣縉奏片一件前奉

硃批飭發敬謹隨繳伏乞

聖鑒謹

奏 道光二十七年四月初一日具

奏奉

硃批知道了欽此又該犯屍傷血癰旣已信而有徵至

均堪証據句旁均奉

殊點是該犯張富之死實無可疑句旁奉

殊連點

奏保雲州回務出力文武員弁摺子

附清單

奏爲遵

旨據實保奏籲懇

恩施仰祈

聖鑒事竊臣前奏官兵圍勦回匪首要各犯續行拏獲  
勒交餘匪漸就肅清一摺欽奉

上諭所有在事出力文武員弁著擇其尤爲出力者據  
實保奏候朕施恩毋許冒濫等因欽此仰見我

皇上激勵戎行微勞必錄之至意伏查雲州軍務在事  
文武員弁經臣責成嚴切明試以功均能大小同  
心妥速奮勉惟署提臣職司專閫未敢復計成勞  
代求

甄叙其出力稍次文員及武職千總以下由臣存記獎  
拔其稍不出力之將備業已分別降革另摺

奏參茲擇其尤爲出力者據實酌保不敢稍有冒濫  
分列文武清單恭呈

御覽祇候

聖裁爲此恭摺具

奏伏乞

聖鑒訓示謹

奏、道光二十七年四月初十日具

奏奉

硃批另有旨欽此內閣奉

上諭李星沅奏遵旨酌保出力人員開單呈覽一摺前



因勦辦滇南回匪迅速蕲事當降旨飭令該督酌保  
在事出力文武員弁茲據該督開單呈覽自應量予  
恩施以示獎勵雲南按察使普泰著交部從優議叙  
署迤西道准升順甯府知府黃德濂著交軍機處記  
名以道員升用開化府知府寶俊著賞加道銜試用  
知州胡道驥著免補本班以同知直隸州不論繁簡  
儘先升用候補鹽提舉夏光煜試用通判孫曷候補  
按察司經歷吳榮昌均著各以本班儘先補用准升

知縣景堯春著俟服闋後以知縣本班儘先補用祿  
豐縣知縣張錦著賞加同知銜准升府經歷陳慶基  
候補府經歷鄭自耀均著免補本班以知縣歸部儘  
先選用南甯縣白水巡檢周錫桐麗江縣典史郭貞  
廉均著以府經歷縣丞儘先升用降調騰越鎮總兵  
李能臣著開復總兵并交軍機處記名東川營參將  
愛興阿著賞換花翎以副將升用先換頂帶鶴麗鎮  
游擊倭什渾泰著賞戴花翎候補都司懷唐阿著賞

戴藍翎騰越鎮都司呂飛鵬著以遊擊儘先升用騰  
越鎮守備楊遵永昌協守備周鴻勳大理營千總陳  
章均著賞戴藍翎鶴麗鎮守備昌盛元著以都司儘  
先升用鶴麗鎮千總和鑑著以守備儘先升用先換  
頂帶騰越鎮千總汪海鶴麗鎮千總楊長桂維西協  
千總李高均著以守備儘先升用楊長桂并著賞戴  
藍翎汪海并著賞加都司銜騰越明光隘土守備銜  
左大雄著改爲土守備世職承襲維西土弁王榮喃

世祿均著賞戴藍翎該部知道單二件并發欽此

雲南按察使普泰

該司經臣飭委先赴大理府城籌貯軍餉旋以  
蒙化回寨素稱獷悍附近復有浮言迅卽移駐  
彈壓并爲大營策應各路布置周妥威信交孚  
人心安帖擬請

旨交部從優議叙

署池西道准升順甯府知府黃德濂

該員勇於任事明於審機設間檢渠具有成算

至籌餉節慎鞠犯精詳均極任怨任勞始終一  
力擬請

旨以道員交部記名卽行升用

開化府知府寶俊

該員奉委出省往來順甯雲州會同署迤西道  
悉心籌勦并訊明犯事首要相機飭拏靜密有  
謀精勤無間擬請

賞加道銜

試用知州胡道驥

該員隨赴大營分帶兵練圍勦密諭回寨矜耆  
開誠授計擒獻首從各犯至十數名之多近復  
委署雲州辦理善後機警能事膽識俱優擬請  
旨免補本班以同知直隸州不論繁簡儘先升用

候補鹽提舉夏光煜試用通判孫昺准升知縣景  
堯春候補按經歷吳榮昌

該員等經理文案稽核軍糧委審初獲各犯均

能細心詳慎深得要領夏光煜孫曷吳榮昌擬  
請

旨各以本班儘先補用景堯春現報丁艱請俟服闋後  
以知縣本班儘先補用

祿豐縣知縣張錦

該員隨同臬司前赴蒙化籌防要隘化導漢回  
數月奔馳不辭勞瘁擬請

賞加同知銜



准升府經歷陳慶基候補府經歷鄭自耀

該員等委管糧臺支應出納詳審條理分明陳  
慶基訪獲漢奸黎小科一名又向回寨勒獻首  
犯海連升一名鄭自耀訪獲緬甯逃出要犯馬  
占魁一名均擬請免補本班以知縣歸部儘先  
選用

南甯縣白水巡檢周錫桐麗江縣典史郭貞廉

該員周錫桐隨營帶練堵截回匪去路甚爲得

力幫辦糧局亦能明晰鈎稽郭貞廉隨赴猛浪  
勦匪擒解要犯馬效青卽大白象一名均擬請  
以府經歷縣丞儘先升用

騰越鎮總兵降一級調用李能臣

該總兵直撲性成夙尙驍勇此次先經

奏劾尤極愧奮敢前親督將備兵練分佈九營四面  
圍勦疊次殲擒匪犯合營推爲首功擬請

旨開復總兵免其降調仍畱雲南補用

東川營參將愛興阿

該將由大營分勦猛浪攻破賊巢殲斃匪犯七  
八十名搜獲匪犯馬秉良馬二白等十三名及

劈山礮鳥機礮趕羊鞭鎗矛賊旗等件又計檢  
要犯馬效青卽大白象一名該將原戴藍翎擬  
請

賞換花翎以副將升用先換頂帶

鶴麗鎮遊擊倭什渾泰候補都司懷唐阿

該將等隨同提鎮總理營務相度地形分合進  
勦連得勝仗復於文筆山等處督放九節大礮  
轟擊賊營賊始窮蹙倭什渾泰擬請

賞戴花翎懷唐阿擬請

賞戴藍翎

騰越鎮都司呂飛鵬

該都司管帶普洱官兵紮營雲州東路合攻賊寨殲擊多匪復擒獲要犯馬逢春一名奪獲賊礮一具擬請以遊擊儘先升用

騰越鎮守備楊遵鶴麗鎮守備呂盛元永昌協守備周鴻勳大理營千總陳章

該守備等由樂黨進兵時有斬獲觀音閣一戰  
施放大礮轟振賊巢冒雨直前搶擊斃賊無數  
楊遵曾受鎗傷嗣復疊用火箭火毬飛入寨內  
賊多燬傷潰亂楊遵周鴻勳本以都司儘先升  
用之員應與千總陳章均擬請

賞戴藍翎呂盛元擬請以都司儘先升用

鶴麗鎮千總和鑑

該千總先在大營逐日打仗殺賊復隨參將愛

興阿前往猛浪攻勦賊巢奮勇搜洗不遺餘力  
擬請以守備儘先升用先換頂帶

騰越鎮千總汪海鶴麗鎮千總楊長桂維西協千  
總李高

該千總等屢次帶兵進攻回寨殲斃賊匪多名  
李高設伏竹林接應兵練殺賊身受鎗傷楊長  
桂肋傷未愈仍卽奮勇接仗復傷左肩汪海由  
三棵樹直撲賊寨當先衝擊右乳下致被鎗傷

洵屬奮不顧身均擬請以守備儘先升用楊長  
桂併擬請

賞戴藍翎汪海併擬請

賞加都司銜

騰越明光隘土守備銜左大雄

該土弁深明大義有勇知方當進攻雲州時先  
燬樂黨連戰克捷直偏賊寨安營象山賊蹤頓  
消兵威益振及事竣撤練猶復搜檢零匪到底



不辭足當邊地干城擬請

旨以土守備銜改爲土守備世職承襲用昭獎勵

維西土弁王榮喃世祿

該土弁等管帶維西獐獐練協同官兵臨陣殺  
賊最爲出力均擬請

賞戴藍翎

請獎滇省二次捐輸軍需各官紳摺子

奏爲滇省官紳二次捐輸軍需經費恭摺奏懇

天恩俯准獎勵事竊照道光二十六年二月內勦辦回  
匪借動鹽課項下銀兩

奏准由滇捐輸歸款扣滿一年停止嗣因大小猛統  
回匪突入雲緬滋擾調兵勦辦借動鹽課溢餘銀  
兩撥給經費未便久懸應卽歸入捐輸案內彌補  
滇省山程修阻外省捐生恐多觀望復經臣李星

沅

奏請援照陝甘收捐事例於黔省藩庫就近上庫解  
滇并請展限至本年十二月截止在案查自二十  
六年五月十五奉

旨之日起至十一月二十三日滇省初次捐輸官紳趙  
維廣等業經臣李星沅奏懇

鴻施獎勸茲據藩司趙光祖等詳報自上年十一月二  
十四日起至本年四月初九日止滇省二次計收

捐銀六萬四千六百九十七兩開單請

奏前來臣等查該員等情殷報効踴躍急公自應仰懇

天恩逾格獎勵以昭激勸現在呈請捐輸者尙不乏人除俟捐有成數另行具

奏并飭藩司將所捐銀兩驗收貯庫撥還歸款報部外謹將姓名履歷捐輸銀數另繕清單恭呈

御覽伏乞

皇上聖鑒訓示謹

奏 道光二十七年四月初十日具

奏奉

硃批該部議奏單併發欽此

奏明咨飭蔭德布仍署提督摺子

奏爲雲南提督印務咨飭仍舊署理以專責成恭摺  
奏祈

聖鑒事竊准兵部咨開道光二十七年三月初四日內  
閣奉

上諭蔭德布著畱雲南以總兵候補榮玉材著調補雲  
南提督欽此臣查升任湖北提督榮玉材前經奏請

陛見本年二月初間由貴州鎮遠府迎招北上現蒙

簡調雲南計由京抵任尙需時日蔭德布久署提督熟  
悉情形當此回務甫竣搜除零匪籌辦善後事宜  
自應仍令接署始終督飭經理俟榮玉材到日再  
行交卸畱補本省總兵除咨飭遵照外理合恭摺  
具

奏伏乞

皇上聖鑒謹

奏 道光二十七年四月初十日具

奏奉

硃批覽欽此



附奏搜除雲州零匪片子

再雲州回務甫竣自以搜除零匪爲目前第一要務經臣嚴飭查辦旋據署騰越鎮總兵李能臣順甯府知府黃德濂督同該州文武該寨衿耆等於猛浪訪獲逸犯黃小喜一名訊據供認去冬曾入緬甯隨同燒搶復至雲州抗拒官兵屬實卽飭在犯事地方依律處決以昭炯戒又於新村訪拏新興州外回黑臉馬五馬滿大等犯該二犯持械拒

捕當經兵役格殺割取首級又剖獲尋甸州外回馬滿五耳記及鎗刀矛桿等件又搜獲前在雲州搶去吏目鈕鳴皋衣服八件并生擒匪黨郭萬年張小老馬庭汶馬富呂會原李春有等六名訊據供認同在雲州疊次相幫打仗屬實張小老李春有又供去年八月曾在新興州隨同黑臉馬五與漢民褚發榮等械鬥傷斃多命聞拏逃走等語查前案尙未訊結臣卽據稟批飭速將該犯六名押

解來省審究分別定擬仍飭文武各員務將此項  
匪徒不動聲色實力查拏斷不准稍爲鬆勁致留  
餘孽合併附陳伏乞

聖鑒謹

奏

硃批知道了欽此

附奏交卸雲南撫篆日期片子

再新任雲南撫臣程喬采於本年四月初十日行抵省城經臣飭委雲南府知府桑春榮署撫標中軍福升齎送雲南巡撫關防交程喬采祇領臣卽於是日交卸兼署撫篆合併陳明謹

奏

硃批知道了欽此

奏謝調補兩江總督摺子

奏爲敬陳微臣感激惶悚下忱叩謝

天恩仰祈

聖鑒事竊臣於道光二十七年四月十二日准吏部咨  
開三月十六日內閣奉

上諭兩江總督著李星沅調補林則徐著補授雲貴總  
督俱卽赴新任毋庸來京請訓林則徐未到任以前  
雲貴總督著程福采兼署等因欽此聞

命自

天惴恐無地伏念兩江政端繁劇三省轄境袤延淮南  
北之饜網何以興利除弊江內外之籌備何以思  
患預防卽潛河各有專司而經畫必須兼顧官守  
所繫功過攸同至一提七鎮十協營水陸將備弁  
兵數踰五萬尤宜總持訓練使之有勇知方實與  
察吏安民通商弭盜諸務有倍難於他省者臣於  
蘇撫藩臬歷任均無多日猥以滇黔邊要

簡擢連圻復蒙

寵賚優加循省方增祗懼矧彼江海交會之處適當治  
理叢脞之時惟臣賦質迂庸不敢獨任其難亦惟

臣受

恩深重不敢不獨任其難譬黿戴於三山常懷

高厚策駑驅於千里益矢愚誠現將滇省應辦事宜及  
雲州回務善後與署督臣程燾采悉心熟商臣於

四月十八日交卸督篆并移交雲南學政關防遵

旨卽赴新任所有微臣感激惶悚下忱謹繕摺叩謝  
天恩伏乞

皇上聖鑒謹

奏 道光二十七年四月十八日具

奏奉

硃批知道了欽此



附奏道經湖南懇請

賞假省親片子

再臣母今年七十三歲上年九月由蘇回里未能  
迎養入滇茲臣道經湖南距家甚遠籲懇

鴻慈錫類

賞假十日稍紓將母之忱臣卽由湘江順流而下至湖  
北省垣面晤督臣裕泰籌商漢岸疏銷之法仍由  
水路前赴新任均不敢稍有耽延理合附片陳明

伏乞

聖鑒訓示謹

奏

硃批照卿所請欽此